

四庫全書

經部

欽定四庫全書

春秋尊王發微卷四

宋 孫復 撰

閔公名開莊公子惠王十六年即位閔諡也在  
國逢難曰閔

元年春王正月齊人救邢

威未能帥諸侯以往故猶稱人

夏六月辛酉葬我君莊公

十一月葬

秋八月公及齊侯盟于落姑季子來歸

秋公與齊侯盟于落姑以納季子故季子來歸何也  
莊公薨子般卒閔公沖幼慶父與夫人通勢傾公室  
不朝夕國人汹汹思得季友以平內亂故曰季子來  
歸也子者男子之通稱不言出公子之未命者也落  
姑齊地

冬齊仲孫來

仲孫齊大夫非齊侯命故不稱使非齊侯命則奔也  
不言奔者非奔也仲孫私來也仲孫私來故曰齊仲  
孫來以惡之此與隱元年祭伯來義同字者天子命  
大夫

二年春王正月齊人遷陽

陽微國

夏五月乙酉吉禘于莊公

吉禘于莊公非禮也魯以周公禘于太廟此天子大

祭非諸侯可得用也謂之吉者莊公葬二十二月未  
可吉也故曰五月乙酉吉禘于莊公以著其僭天子  
之惡不言莊宮者明未三年也

秋八月辛丑公薨

此慶父弑也不言慶父弑者諱之也內諱弑故弑君  
之賊皆不書焉不葬者義與隱公同

九月夫人姜氏孫

遜

于邾公子慶父出奔莒

公子慶父夫人姜氏同惡之人也夫人孫于邾故慶

父出奔莒書者深惡季子緩不討賊也案元年公與齊侯盟于落姑以納季子季子來歸獨執國命當是時以魯之衆因齊之力討慶父而戮之勢甚易爾而季子不能也使閔公遽罹弑逆之禍悲哉

冬齊高子來盟

案威十四年鄭伯使其弟語來盟此不言使者高子請來結盟于我也閔公遇弑慶父未討季友立僖僖又非正高子請來結盟于我以定僖公之位故不言

使僖四年楚屈

俱多反

完來盟皆此義也

十有二月狄入衛鄭棄其師

鄭棄其師惡鄭伯也豈奔潰離散云乎哉鄭伯有其師無其將將者百姓之司命也鄭伯以百姓之命授之匪人非棄而何故曰鄭棄其師以惡之噫鄭棄其師梁亡皆自取之也梁亡見僖十九年

春秋尊王發微卷四

欽定四庫全書

春秋尊王發微卷五

宋 孫復 撰

僖公名申莊公子閔公庶兄惠王十八年即位  
僖諡也小心畏忌曰僖

元年春王正月齊師宋師曹師次于聶北救邢

威自滅遂二十年用師征伐皆稱人者以其攘夷狄  
救中國之功未著微之也案莊三十二年狄伐邢閔



元年齊人救邢威未能率諸侯以往故猶稱人馬至此稱師者以其能合二國次于聶北救邢齊威攘夷狄救中國之功漸見少進之也然猶有次焉先言次而後言救者譏緩于救患也滅遂在莊十三年

夏六月邢遷于夷儀齊師宋師曹師城邢

威公不急救患故邢遷于夷儀邢人已遷三國之師乃往助城之故曰齊師宋師曹師城邢也夷儀邢地秋七月戊辰夫人姜氏薨于夷齊人以歸

夫人哀姜也閔二年孫于邾威公取而殺之不言殺者諱之也其言齊人以歸者以其尸歸也哀姜與弑閔公威公討而殺之正也然以其尸歸此則甚矣夷齊地

### 楚人伐鄭

莊十年荆敗蔡師于莘始見于經十四年入蔡稱荆二十三年來聘始進稱人二十八年伐鄭稱荆反狄之今曰楚人伐鄭者以其兵衆地大漸通諸夏復其

舊封比之小國也故自此十數年侵伐用兵皆稱人  
焉

八月公會齊侯宋公鄭伯曹伯邾人于櫟

赤呈反

楚人伐鄭故威合諸侯于櫟公有母喪出會非禮也  
櫟宋地

九月公敗邾師于偃

公櫟會方退親敗邾師于偃其惡可知偃邾地

冬十月壬午公子友帥師敗莒師于鄆

力知反

獲莒孺女

居

反又女  
加反

討慶父也其言獲莒挈者不可言獲莒人爾莒大夫  
不氏未命也慶父閔二年奔鄆魯地

十有二月丁巳夫人氏之喪至自齊

此夫人哀姜之喪也不稱姜者貶之也案孫于邾不  
貶此而貶者孫于邾不貶不以子討母也此而貶者  
正王法也不去氏殺子之罪比文姜殺夫差輕孫邾  
在閔二年

二年春王正月城楚丘

此會櫜諸侯城楚丘也不言諸侯者威公急于救患  
諸侯不一也威公急于救患諸侯不一則孰城之魯  
城之也案閔二年秋入衛覆彼國家君死民散威公  
視之不救其急于救患可知也威公急于救患故諸  
侯不一諸侯不一故魯城之襄五年戌音陳十年戌  
鄭虎牢皆此義也然則善與非善也此威公之命城  
楚丘以存亡國曷以謂之非善雖曰威公之命城楚

丘以存亡國與其亡而存之不若未亡而救之之善也楚丘衛邑不言城衛者衛未遷也

夏五月辛巳葬我小君哀姜虞師晉師滅夏陽

夏一作下

虞師晉師滅夏陽虞序晉上者虞主乎滅夏陽也案隱五年邾人鄭人伐宋莊十五年宋人齊人邾人伐鄭邾序鄭上宋序齊上此虞主乎滅夏陽可知也夏陽微國

秋九月齊侯宋公江人黃人盟于貫

楚故也貫宋地

冬十月不雨

不雨一時即書者僖公憂民懼災之甚也

楚人侵鄭

三年春王正月不雨夏四月不雨徐人取舒六月雨

秋齊侯宋公江人黃人會于陽穀

陽穀齊地

冬公子友如齊涖盟

涖臨也凡言涖盟者受盟于彼也來盟者受盟于我也

楚人伐鄭

四年春王正月公會齊侯宋公陳侯衛侯鄭伯許男曹

伯侵蔡蔡潰遂伐楚次于陘

音刑

威之病楚也久矣故元年會于樞二年盟于貫三年會于陽穀以謀之是時楚方強盛勢陵中國不可易也蔡楚與國故先侵蔡俟其兵震威行然後大舉蔡



既潰遂進師次于敵境陘楚地

夏許男新臣卒

夏許男新臣卒于師不言師者威公之行諸侯安之

與國內同也

楚屈

俱勿反

完來盟于師盟于召

音紹陵

案成二年季孫行父臧孫許叔孫僑如公孫嬰齊師

師會晉卻

去逆反

克衛孫良夫曹公子首及齊侯戰于

鞏齊師敗績秋七月齊侯使國佐如師已酉及國佐

盟于袤婁此不言使者楚子聞蔡潰威師及境大懼  
屈完請盟于師也召陵楚地

齊人執陳轅濤塗

陳轅濤塗陳大夫稱人以執不得其罪也威公既與  
陳侯南服強楚歸而反執陳轅濤塗其惡可知也

秋及江人黃人伐陳

內言及外稱人皆微者也

八月公至自伐楚

出踰二時

葬許穆公冬十有二月公孫茲帥師會齊人宋人衛人鄭人許人曹人侵陳

威公執陳轅濤塗執非其罪秋使魯人江人黃人伐陳冬又會公孫茲宋人衛人鄭人許人曹人侵陳甚矣公孫茲公子牙子

五年春晉侯殺其世子申生

世子世君位者也稱君以殺世子甚之也獻公五子

世子申生次重耳次夷吾次奚齊次卓子皆申生庶弟也獻公愛奚齊欲立之乃殺世子申生可謂甚矣杞伯姬來朝其子

伯姬內女來朝其子者以其子來朝也諸侯來朝猶曰不可杞伯姬來朝其子非禮可知

夏公孫茲如牟

牟微國

公及齊侯宋公陳侯衛侯鄭伯許男曹伯會王世子于

首止

此威帥諸侯致王世子于首止也經言公及齊侯宋公陳侯衛侯鄭伯許男曹伯會王世子于首止者不與威致王世子使與諸侯齊列也故先言公及諸侯而後言會王世子以尊之尊王世子所以重威之惡也首止衛地

秋八月諸侯盟于首止鄭伯逃歸不盟

不言王世子者會猶可言也盟之則甚矣王世子世

天下者也非諸侯可得盟也鄭伯逃歸不盟者鄭伯不肯受盟故逃歸言逃懼齊之甚

楚人滅弦弦子奔黃

此言楚人滅弦者惡威不能救也故弦子不名十年狄滅溫十二年楚人滅黃同此

九月戊申朔日有食之冬晉人執虞公

稱人以執惡晉侯也五等之制雖其國家宮室車旗衣服禮儀之有差而天子命之南面稱孤皆諸侯也

其或有罪方伯請于天子命之執則執之不得專執  
也有罪猶不得專執况無罪者乎春秋之世諸侯無  
小大唯力是恃力能相執則執之無復請于天子故  
孔子從而錄之正以王法或則稱侯以著其惡或則  
稱人以奪其爵稱侯以著其惡者謂雖非王命執得  
其罪其罰輕故但著其專執之惡二十八年晉侯入  
曹執曹伯畀宋人成十五年晉侯執曹伯歸于京師  
之類是也稱人以奪其爵者謂既非王命又執不得

其罪其罰重故奪其爵此年晉人執虞公十九年宋人執滕子嬰齊之類是也

六年春王正月夏公會齊侯宋公陳侯衛侯曹伯伐鄭圍新城

鄭伯逃首止之盟故威帥諸侯伐鄭圍新城新城鄭邑

秋楚人圍許諸侯遂救許冬公至自伐鄭

出踰三時



七年春齊人伐鄭夏小邾子來朝

小邾子邾之別封也故曰小邾子以別之

鄭殺其大夫申侯

鄭殺其大夫申侯稱國以殺不以其罪也

秋七月公會齊侯宋公陳世子款鄭世子華盟于甯母  
言鄭世子華者齊人伐鄭未已鄭伯懼欲求成于齊  
故先使世子華受盟于甯母也甯母魯地

曹伯班卒公子友如齊冬葬曹昭公

八年春王正月公會王人齊侯宋公衛侯許男曹伯陳世子款盟于洮

王人微者也序于諸侯之上者春秋尊王故王人雖微序于諸侯之上也洮魯地

鄭伯乞盟

此以其逃首止之盟乞之也齊人連年伐鄭世子華雖受盟寧毋鄭伯猶懼見討故自乞盟于此也乞者卑請之辭

夏狄伐晉秋七月禘于太廟用致夫人

禘天子大祭夫人成風也不言風氏者成風僖公妾母嫁非廟見不得與祭僖公既君欲尊其母故因此秋禘用夫人之禮致于太廟使之與祭也妾母稱夫人僭之大者故不言風氏以貶之案莊元年夫人文姜孫于齊貶去姜氏此不言風氏其貶可知也

冬十有二月丁未天王崩

惠王書崩不書葬者得常也

九年春王三月丁丑宋公御

音說

卒夏公會宰周公

齊侯宋子衛侯鄭伯許男曹伯于葵丘

威以諸侯致宰周公于葵丘經以宰周公主會爲文  
者不與威以諸侯致天子三公也宋在喪故稱子葵  
丘宋地

秋七月乙酉伯姬卒

直曰伯姬未適人也未適人卒者許嫁則服服則得  
常常則不書書者譏不服也十六年鄆

似陵反

季姬卒

文十二年子叔姬卒皆此義也

九月戊辰諸侯盟于葵丘

威公圖伯內帥諸侯外攘夷狄討逆誅亂以救中國  
經營馳驟出入上下三十年勞亦至矣然自服強楚  
其心乃盈不能朝于京師翼戴天子興衰振治以復  
文武之業前此五年致王世子于首止今復致宰周  
公于葵丘觀其心也盈已甚矣孟子稱五伯威公為  
盛葵丘之會諸侯束牲載書而不歃血初命曰誅不

孝無易樹子無以妾為妻再命曰尊賢育才以彰有  
德三命曰敬老慈幼無忘賓旅四命曰士無世官官  
事無攝取士必得無專殺大夫五命曰無曲防無遏  
糴無有封而不告者豈美威哉蓋疾當時諸侯有所  
激而云爾故曰五伯者三王之罪人也今之諸侯五  
伯之罪人也今之大夫今之諸侯之罪人也此葵丘  
之盟威公之惡從可見矣

甲子晉侯侂

音鬼

諸卒冬晉里克殺其君之子奚齊

奚齊未踰年之君也其言晉里克殺其君之子奚齊者奚齊庶孽其母嬖獻公殺世子申生以立之春秋不與故曰晉里克殺其君之子奚齊以惡之也

十年春王正月公如齊

公始朝齊也不至者朝齊安之與他國異也十五年如齊同此

狄滅溫溫子奔衛晉里克弑其君卓及其大夫荀息狄滅溫溫子奔衛晉里克弑其君卓及其大夫荀息者甚之之辭也威

二年宋督弑其君與

音

夷及其大夫孔父莊十二年

宋萬弑其君捷及其大夫仇牧其義一也

夏齊侯許男伐北戎晉殺其大夫里克

里克弑奚齊卓子不以討賊辭書者惠公殺之不以  
其罪也惠公立懼其又將賊已以是殺克也故不得  
從討賊辭

秋七月冬大雨

于付反

雪

十有一年春晉殺其大夫平

普悲反

鄭父夏公及夫人姜



氏會齊侯于陽穀

公及夫人姜氏會齊侯于陽穀參譏之也

秋八月大雩冬楚人伐黃

十有二年春王三月庚午日有食之夏楚人滅黃秋七月冬十有二月丁丑陳侯杵臼卒

十有三年春秋侵衛夏四月葬陳宣公公會齊侯宋公陳侯衛侯鄭伯許男曹伯于鹹

鹹衛地

秋九月大雩冬公子友如齊

十有四年春諸侯緣陵

諸侯不序者會鹹諸侯也杞微弱上下同心一力而城之故曰諸侯所以與城楚丘異也緣陵杞邑

夏六月季姬及鄫

似陵反或作繒

子遇于防使鄫子來朝

內女嫁曰歸于某隱二年伯姬歸于紀莊二十六年伯姬歸于杞之類是也出曰來歸宣十六年鄭伯姬來歸成五年杞叔姬來歸之類是也無事而來則曰

來莊二十七年杞伯姬來僖二十八年杞伯姬來之類是也季姬上無歸鄆之文則是未嫁者也此年六月季姬及鄆子遇于防使鄆子來朝明年九月季姬歸于鄆是季姬先與鄆子遇于防而後乃嫁于鄆也此季姬之行不正可知矣故稱及稱遇稱使以著其惡

秋八月辛卯沙鹿崩

沙山名鹿山足也其言沙鹿崩者謂山連足而崩爾

詩曰百川沸騰山冢卒崩山冢卒崩猶以爲異况連足而崩乎此異之甚者

狄侵鄭冬蔡侯盱卒

十有五年春王正月公如齊楚人伐徐三月公會齊侯宋公陳侯衛侯鄭伯許男曹伯盟于牡丘遂次于匡公孫敖帥師及諸侯之大夫救徐

言次言救者惡諸侯緩于救患也諸侯既約救徐而遣大夫往此緩于救患可知也公孫敖公子慶父

牡丘衛地

夏五月日有食之秋七月齊師曹師伐厲

厲楚與國

八月螽九月公至自會

暴露師衆三時

季姬歸于鄆

不書逆者微也

己卯晦震夷伯之廟

大夫之廟書者夷伯僭也春秋亂世諸侯僭天子大夫僭諸侯故此一見大夫之僭焉夷謚字者天子命大夫

冬宋人伐曹楚人敗徐于婁林十有一月壬戌晉侯及秦伯戰于韓獲晉侯

春秋用兵大夫生得曰獲僖元年公子友帥師敗莒

師于鄆獲莒挐

女居女加二反

宣二年宋華元帥師及鄭公

子歸生帥師戰于大棘宋師敗績獲宋華元之類是

也未有諸侯獲諸侯者此言晉侯及秦伯戰于韓獲  
晉侯者賤晉侯疾秦伯之辭也賤晉侯疾秦伯者晉  
侯失道不顧人命以起此戰秦伯獲之則又甚矣故  
言戰言獲以著其惡不言以歸者舉重也韓晉地

十有六年春王正月戊申朔隕石于宋五是月六鷁

力五

反退飛過宋都

五石異之甚者也六鷁異之細者也故曰正月戊申  
朔隕石于宋五是月六鷁退飛過都也其言是月者

不可再書正月故也

三月壬申公子季友卒

公子季友卒字者天子命大夫也

夏四月丙申鄆季姬卒秋七月甲子公孫茲卒冬十有  
二月公會齊侯宋公陳侯衛侯鄭伯許男邢侯曹伯于  
淮

十有七年春齊人徐人伐英氏夏滅項

此齊人徐人滅項也上言齊人徐人伐英氏下言滅



項此齊人徐人滅項可知也英氏楚與國

秋夫人姜氏會齊侯于卞九月公至自會

踰三時卞魯地

冬十有二月乙亥齊侯小白卒

十有八年春王正月宋公曹伯衛人邾人伐齊

齊威公六子無嫡長公子無虧次惠公元次孝公昭  
次昭公潘次懿公商人次公子雍威公卒無虧立五  
公子並爭齊大亂宋襄以諸侯伐齊孝公故也

夏師救齊五月戊寅宋師及齊師戰于麇

魚免反又音言音序

齊

師敗績

宋師伐齊以五月敗齊師于麇無虧死遂立孝公案

二十七年齊昭卒八月葬齊孝公此立孝公可知也

春秋之義伐者為客受伐者為主此以宋主齊者不

與宋襄伐齊也宋襄伐人之喪擅易人之主甚矣麇

齊地

狄救齊秋八月丁亥葬齊桓公

九月而葬

冬邢人狄人伐衛

邢人狄人伐衛救齊也狄稱人者善救齊

十有九年春王三月宋人執滕子嬰齊

宋人執滕子嬰齊不得其罪也滕子名者惡遂失國也

夏六月宋公曹人邾人盟于曹南鄫子會盟于邾己酉邾人執鄫子用之

鄫子不及曹南之盟故會盟于邾邾子執鄫子用之  
用之為牲歃血以盟也諸侯不得相執邾人不道執  
鄫子用之天子不能誅也悲夫

秋宋人圍曹衛人伐邢冬會陳人蔡人楚人鄭人盟于  
齊

內不出主名外稱人皆微者

梁亡

梁亡惡不用賢也梁伯守天子土有宗廟社稷之重

有軍旅民人之衆左右前後朝夕與為治莫有聞者是左右前後皆非其人也左右前後皆非其人不亡何待故直曰梁亡以惡之

二十年春新作南門

城郭門戶皆有舊制壞則修之常事書者譏其侈泰妨農功改舊制也案莊二十九年春新延廡不言作此言作改舊制可知也

夏部音告子來朝五月乙巳西宮災

西宮公別宮也

鄭人入滑狄齊人狄人盟于邢

狄稱人者猶與中國故也

冬楚人伐隨

二十有一年春秋侵衛宋人齊人楚人盟于鹿上

齊桓公死宋人欲宗諸侯故盟于鹿上鹿上宋地

夏大旱秋宋公楚子陳侯蔡侯鄭伯許男曹伯會于孟  
執宋公以伐宋

宋襄合諸侯于孟以致楚子楚子怒執宋公以伐宋  
不言楚子執宋公以伐宋者不與楚子執宋公以伐  
宋也故以諸侯共執為文所以抑強夷而存中國也  
然則楚稱子者案吳楚本子爵入春秋始則曰荆曰  
楚曰吳終則稱人稱子楚始謂之荆者楚先吳僭罪  
大貶重猶曰荊州之夷也既而曰楚曰吳者君臣同  
辭以國舉之也終則稱人稱子者以其漸同中國與  
諸侯會盟及修禮來聘稱人少進也稱子復舊爵也

吳楚之君狂僭之惡罪在不赦固宜終春秋之世貶之孔子不終春秋之世貶之者傷聖王不作中國失道之甚也孟宋地

冬公伐邾楚人使宜申來獻捷

楚人楚子也不言楚子者以其執宋公伐宋貶之也捷宋捷也不言宋捷者不與楚捷于宋也莊三十一年齊侯來獻戎捷言齊侯言戎捷義同十有二月癸丑公會諸侯盟于薄釋宋公



楚子執宋公以伐宋公懼故會諸侯盟于薄釋宋公  
不言楚子釋宋公者不與楚子專釋也

二十有二年春公伐邾取須句

其俱反

公伐邾取須句言伐言取者惡公伐邾非以其罪利  
其土地也

夏宋公衛侯許男滕子伐鄭

鄭即楚故也案莊十六年荆伐鄭二十八年荆伐鄭  
僖元年楚人伐鄭二年楚人侵鄭三年楚人伐鄭鄭

不即楚此而即者齊威既死宋襄不能與楚抗也

秋八月丁未及邾人戰于升陘

音刑

此公及邾人戰也不言公者公不道伐邾取須句以起此戰惡之大者故曰及邾人戰于升陘以諱之也  
升陘魯地

冬十有一月己巳朔宋公及楚人戰于泓宋師敗績

夏宋公衛侯許男滕子伐鄭鄭楚與國也故楚人伐宋冬十有一月宋公及楚人戰于泓宋師敗績襄公

傷焉噫宋襄無齊威之資欲紹齊威之烈帥諸侯以  
致強楚故孟之會見執受伐今復與楚爭鄭以起此  
戰喪師泓水之上身傷七月而死為中國羞惜哉泓  
宋水

二十有三年春齊侯伐宋圍緡

楚人敗宋公子泓齊侯視之不救而又加之以兵故  
伐圍並書以誅其惡

夏五月庚寅宋公茲父卒

傷于泓故

秋楚人伐陳冬十有一月杞子卒

二十有四年春王正月夏狄伐鄭秋七月冬天王出居于鄭

襄王也周無出此言出者惡襄王自絕于周則奔也  
其言居于鄭者天子至尊故所至稱居與諸侯異也  
晉侯夷吾卒

二十有五年春王正月丙午衛侯燬滅邢

衛侯名者孔子傷天下之亂時無賢伯邢衛皆齊威  
所存之亡國也衛侯不念威公之大德以絕先祖之  
支體甚矣故生而名之也

夏四月癸酉衛侯燬卒宋蕩伯姬來逆婦

伯姬內女嫁為宋大夫蕩氏妻為其子來逆婦也伯  
姬自為其子來逆婦非禮也

宋殺其大夫

稱國以殺不以其罪也不稱名氏者與莊二十六年

曹殺其大夫義同

秋楚人圍陳納頓子于頓

頓子迫于陳懼而奔楚故楚人圍陳納頓子于頓頓  
微國

葬衛文公冬十有二月癸亥公會衛子莒慶盟于洮

二十有六年春王正月己未公會莒子衛甯速盟于向

舒亮反

齊人侵我西鄙公追齊師至鄆音弗弗及

侵稱人追稱師者不可言公追齊人故也至鄆弗及

者譏魯失戎備明齊人已去而追之爾鄆齊地

夏齊人伐我北鄙衛人伐齊公子遂如楚乞師

齊再伐我故公子遂如楚乞師夫國之大小師之衆寡皆有王制不可乞也書者惡魯不能內修戎備而外乞師于夷狄

秋楚人滅夔以夔子歸

夔楚同姓國不名者略夷狄

冬楚人伐宋圍緡公以楚師伐齊取穀

魯既不能內修戎備而乞師于荆楚以伐太公之後  
又取其地焉此公之惡可知也

公至自伐齊

二十有七年春杞子來朝夏六月庚寅齊侯昭卒秋八  
月乙未葬齊孝公乙巳公子遂帥師入杞

春杞子來朝秋公子遂帥師入杞甚矣

冬楚人陳侯蔡侯鄭伯許男圍宋

楚子自會盂執宋公伐宋之後復貶稱人冬楚人使



宣申來獻捷二十二年宋公及楚人戰于泓二十五  
年楚人圍陳納頓子于頓二十六年楚人滅夔以夔  
子歸此年楚人陳侯蔡侯鄭伯許男圍宋是也陳侯  
蔡侯鄭伯許男不同貶者四國之君雜然從楚圍中  
國其貶自見也會孟伐宋在二十一年  
十有二月甲戌公會諸侯盟于宋

諸侯圍宋公常與楚故會諸侯盟于宋

二十有八年春晉侯侵曹晉侯伐衛

曹衛楚與國也晉侯將救宋故侵曹伐衛不言遂者  
非繼事也此侵曹既反而後伐衛耳故曰晉侯侵曹  
晉侯伐衛也

公子買戍衛不卒戍刺

七賜反

之楚人救衛

公叛晉與楚故使公子買戍衛且以晉之兵力非公  
子買所能伉也故買不卒戍而歸徐聞楚人救衛公  
懼楚之見討也乃殺買以說焉公內殘骨肉外苟說  
于强夷故曰公子買戍衛不卒戍刺之以著其惡內

殺大夫曰刺

三月丙午晉侯入曹執曹伯畀宋人

晉侯侵曹曹不服罪故入曹執曹伯畀宋人畀與也  
晉侯入曹執曹伯不歸于京師畀宋人使自治之甚  
矣不奪爵者曹伯背晉即楚晉侯圖伯執得其罪也  
夏四月己巳晉侯齊師宋師秦師及楚人戰于城濮楚  
師敗績

晉文始見于經孔子遽書爵者與其攘外患救中國

之功不旋踵而建也昔者齊威既歿楚人復張猖狂  
不道欲宗諸侯自城濮之敗不犯中國者十五年文  
公之功偉矣故春秋與之

楚殺其大夫得臣

不氏未命也

衛侯出奔楚

衛侯聞晉師勝故懼而奔楚不名者以見晉文逼逐  
而去

五月癸丑公會晉侯齊侯宋公蔡侯鄭伯衛子莒子盟  
于踐土

踐土之盟襄王在是也不書者不與晉文致天子也  
晉文既攘強楚不能朝于京師廟獻楚俘以警夷狄  
反以乘勝之衆坐致衰陵之主盟諸侯于是甚矣踐  
土鄭地

陳侯如會

來不及盟故曰如會陳本與楚楚敗歸晉國

公朝于王所

非禮也書曰六年五服一朝又六年王乃時巡諸侯各朝于方嶽公朝于王所非禮可知也不言諸侯者言諸侯則是天子可得致也故至申之朝諸侯亦沒而不書焉

六月衛侯鄭自楚復歸于衛

此言自楚復歸于衛者衛侯鄭奔楚由楚而得返于衛也衛侯鄭與楚比周故楚人返之于衛

衛元咺

許晚反

出奔晉

晉侯使元咺奉公子瑕受盟于踐土衛侯復歸故元咺懼奔晉以訴之

陳侯款卒

不地者安之也與四年許男新臣義同

秋杞伯姬來公子遂如齊冬公會晉侯齊侯宋公蔡侯鄭伯陳子莒子邾子秦人于溫天王狩于河陽

冬會于溫其言天王狩于河陽者不與晉文再致天

子也晉文再致天子惡之大者故孔子以襄王自狩  
爲文所以黜強侯而尊天子也河陽晉地

士申公朝于王所

士申公朝于王所深惡再致襄王以諸侯朝也日繫  
于月而此不月者脫之

晉人執衛侯歸之于京師

晉人執衛侯歸之于京師者元咺故也晉文旣勝強  
楚不能招携撫貳以崇大德助其臣而執其君非所



以宗諸侯也故曰晉人以疾之

衛元咺自晉復歸于衛

晉文既執衛侯歸之于京師乃返元咺于衛

諸侯遂圍許

諸侯再會許皆不至

曹伯襄復歸于曹

三月晉侯入曹執曹伯畀宋人此言曹伯襄復歸于曹者晉文赦之也晉文執之曷為晉文赦之春秋亂

世強侯執辱小國之君無復天子命執之赦之自我  
而已案二百四十年唯成十六年曹伯負芻執而得  
歸由天子命故曰曹伯歸自京師以異其文它皆否  
焉

遂會諸侯圍許

二十有九年春介葛盧來

東夷微國不言朝者不能行朝禮也

公至自圍許

公出踰時

夏六月會王人晉人宋人齊人陳人蔡人秦人盟于翟泉

內不出主名外曰某人某人盟于翟泉皆微者也翟泉周地

秋大雨

于付反

雹冬介葛盧來

一歲而再來非禮之甚

三十年春王正月夏秋侵齊秋衛殺其大夫元咺及公

子瑕衛侯鄭歸于衛

此言衛殺其大夫元咺及公子瑕衛侯鄭歸于衛者  
衛侯道殺二子而歸也案二十八年晉文執衛侯歸  
之于京師衛侯得返懼二子之不納也故道殺二子  
而歸衛侯道殺二子而歸無惡文者二子之禍皆晉  
文為之也

晉人秦人圍鄭

程泉之盟鄭不至故

介人侵蕭冬天王使宰周公來聘公子遂如京師遂如  
晉

皆非禮也天子至尊非諸侯可得伉儷與襄王交聘  
伉孰甚焉故曰天王使宰周公來聘公子遂如京師  
遂如晉以惡之

三十有一年春取濟

子禮反

西田

復侵地也濟西田本魯地

公子遂如晉夏四月四卜郊不從乃免牲

郊者祭天之名也天子祭天地無所不通諸侯祭其境內山川魯諸侯也以諸侯而用天子之祭僭孰甚焉故此年夏四月四卜郊不從乃免牲宣三年正月郊牛之口傷改卜牛牛死乃不郊成七年正月鼯鼠食郊牛角改卜牛鼯鼠又食其角乃免牛不郊十年五月五卜郊不從乃不郊之類一則因其瀆亂不時一則從其災異示變以著其僭天子之惡也全者曰牲傷者曰牛

猶三望

猶者可止之辭三望之說先儒不同公羊言泰山河  
海鄭氏謂海岱淮杜預稱分野之星及境內山川據  
鄭杜止以諸侯祭其封內云爾况河海淮非魯封內  
又諸侯無祭分野星辰之事且魯既僭天子蓋于四  
望之中祭其大者三爾公羊得之

秋七月冬祀伯姬來求婦

伯姬內女來求婦者為其子來求婦也為其子來求

婦非禮也

狄圍衛十有二月衛遷于帝丘

衛畏狄自遷也帝丘衛地

三十有二年春王正月夏四月己丑鄭伯捷卒衛人侵狄狄衛人及狄盟

不地者就狄盟也復出衛人者嫌與內之微者同  
冬十有二月己卯晉侯重耳卒

三十有二年春王二月秦人入滑齊侯使國歸父來聘



夏四月辛巳晉人及姜戎敗秦師于殽

此晉襄及姜戎敗秦師于殽也其稱人者秦人入滑雖曰不可晉襄與姜戎要而敗之此又甚焉晉襄厄人于險非仁也却喪用兵非孝也故曰晉人及姜戎敗秦師于殽以疾之

癸巳葬晉文公狄侵齊公伐邾取訾

子斯反

婁秋公子遂

帥師伐邾

夏公伐邾取訾婁秋公子遂帥師伐邾其惡可知

晉人敗狄于箕

箕晉地

冬十月公如齊十有二月公至自齊

案十年十五年公如齊不至此至者齊桓既死遼朝  
強齊危之也


乙巳公薨于小寢

小寢非正也

隕霜不殺草李梅實

不時也五行傳曰視之不明是謂不哲厥罰常燠時  
則有草木妖

晉人陳人鄭人伐許



春秋尊王發微卷五

欽定四庫全書

經部

春秋尊王發微卷

七六

詳校官給事中臣戴璐

給事中臣溫常綬覆勘

覆校官主事臣龔敬身

校對官中書臣蔣寬

謄錄監生臣萬朝宗

欽定四庫全書

春秋尊王發微卷六

宋 孫復 撰

文公名興僖公子襄王二十六年即位文謚也

慈惠愛民曰文

元年春王正月公即位

書即位者文公繼僖非天子命也

二月癸亥日有食之天王使叔服來會葬

諸侯五月而葬僖公薨至此三月天王使叔服來會  
葬非禮也

夏四月丁巳葬我君僖公

五月而葬書者不請諡也

天王使毛伯來錫公命

古者三載考績三考黜陟幽明文公即位功未及施  
而天王使毛伯來錫公命濫賞也毛伯天子卿毛采  
地伯爵

晉侯伐衛叔孫得臣如京師衛人伐晉秋公孫敖會晉侯于戚冬十月丁未楚世子商臣弑其君頹憂倫反

稱世子以弑甚商臣之惡也不言其父而言其君者君之于世子有父之親有君之尊言世子所以明其親也言其君所以明其尊也商臣之于尊親盡矣

公孫敖如齊

二年春王二月甲子晉侯及秦師戰于彭衙秦師敗績秦師伐晉以報殽之役戰于彭衙秦師敗績殽之役

在僖三十三年彭衙秦地

丁丑作僖公主

丁丑作僖公主緩也禮平旦而葬日中反而祭謂之虞其主用桑期而小祥其主用栗僖公薨至此十五  
月作僖公主緩可知也

三月乙巳及晉處父盟

此公及處父盟也不言公者不與處父敵公也不與  
處父敵公故不言公處父不氏未命也



夏六月公孫敖會宋公陳侯鄭伯晉士穀

未木反

盟于垂

隴

垂隴鄭地

自十有二月不雨至于秋七月

不雨歷三時乃書者惡文公怠于國政不懼旱災之甚

八月丁卯大事于太廟躋僖公

大事者大其事也僖公閔公庶兄繼閔而立其位當

在閔下文公既君欲尊其父故大其事躋于閔公之上躋升也夫鬼神有常祀昭穆有常位不可易也文公二月丁丑作僖公主八月丁卯大事于太廟躋僖公瀆慢不恭也甚矣

冬晉人宋人陳人鄭人伐秦

報彭衙之戰

公子遂如齊納幣

喪制未終使同姓大夫圖婚

三年春王正月叔孫得臣會晉人宋人陳人衛人鄭人  
伐沈沈潰夏五月王子虎卒

外大夫來赴非禮也

秦人伐晉秋楚人圍江雨

于付反

螽音終于宗

雨螽于宋謂雨而為螽也猶雨毛雨土之類爾

冬公如晉十有二月己巳公及晉侯盟晉陽處父帥師  
伐楚以救江

先言伐楚而後言以救江者惡不能救江也楚人圍

江陽處父帥師不急赴之乃先伐楚欲其引兵自救而江圍解非救患之師也故明年秋楚人滅江

四年春公至自晉

自是公朝強國皆至者惡其輕去宗廟遠朝強國或執或辱危之也

夏逆婦姜于齊

此公逆婦姜于齊也不言公者諱之也不言逆女者以其成禮于齊也以其成禮于齊故不言公以諱之

狄侵齊秋楚人滅江晉侯伐秦衛侯使甯俞來聘

冬十有一月壬寅夫人風氏薨

成風也僖公妾母

五年春王正月王使榮叔歸含

戶暗反  
或作哈

且賵

方鳳反

非禮也成風僭夫人襄王不能正又使榮叔含之賵之此非禮可知也榮叔周大夫榮采地叔字不言天王者脫之下會葬同此

三月辛亥葬我小君成風王使召伯來會葬

成諡也先言葬而後言會者不及事也成風諸侯妾母襄王既使榮叔歸含且賵又使召伯來會葬甚矣召伯天子卿召采地伯爵

夏公孫敖如晉秦人入郛

音若

秋楚人滅六

郛六微國

冬十月甲申許男業卒

六年春葬許僖公夏季孫行父如陳秋季孫行父如晉八月乙亥晉侯驩卒冬十月公子遂如晉葬晉襄公晉

殺其大夫陽處父晉狐射姑出奔狄閏月不告月猶朝于廟

春秋二百四十二年閏月多矣獨此書不告月者是常告也文既不告閏月猶朝于廟非禮可知

七年春公伐邾三月甲戌取須句

其俱反

惡再取也案僖二十二年公伐邾取須句後其地復

入于邾

遂城郛

音吾

遂城郛重勞民也郛魯邑

夏四月宋公王臣卒宋人殺其大夫

稱人以殺殺有罪也不言名氏者脫之也

戊子晉人及秦人戰于令

力呈反狐

秦晉自殺之役結怨用兵償報不已二年書晉侯及秦師戰于彭衙此稱人者疾之甚也故自是不復名其將帥但曰某人某人而已言戰不言敗者勝負敵也令狐秦地



晉先蔑奔秦

先蔑書者不可言晉人故也不言出者明自軍中而去

狄侵我西鄙秋八月公會諸侯晉大夫盟于扈

扈之會不序者略之也公本期會于扈而不至焉故略之也

冬徐伐莒

徐不稱人夷也

公孫敖如莒涖盟

八年春王正月夏四月秋八月戊申天王崩

襄王也

冬十月壬午公子遂會晉趙盾盟于衡雍

於用反

乙酉公

子遂會雒戎盟于暴

再言公子遂者非繼事也此壬午公子遂與晉趙盾

盟于衡雍乙酉還至暴又與雒戎盟爾故曰壬午公

子遂會晉趙盾盟于衡雍乙酉公子遂會雒戎盟于

暴也公子遂莊公子暴衡雍皆鄭地

公孫敖如京師不至而復丙戌奔莒

公孫敖如京師弔喪也不至而復中道而反也丙戌  
奔莒文公不能誅敖得以自恣也案宣八年公子遂  
如齊至黃乃復至黃乃復者以疾而還也公子遂以  
疾而還義猶不可況敖如京師弔喪中道而返乎此  
敖之罪固不容誅矣而又使之自恣得以奔莒此文  
公之惡亦可見矣不言所至者舉京師為重也

各宋人殺其大夫司馬宋司城來奔

宋人殺其大夫司馬宋司城來奔譏六卿也大國三卿次國二卿不書名氏者脫之左氏稱司馬握節以死故書以官司城蕩意諸效節于府人而出公以其官逆之亦書以官公羊言皆以官舉者宋三世無大夫穀梁謂以官稱無君之辭也于義皆所未安何者莊二十六年曾殺其大夫僖二十五年宋殺其大夫文七年宋人殺其大夫皆以官舉故也此不書名氏

脫之斷可知矣

九年春毛伯來求金

襄王未葬毛伯來求金其惡可知也

夫人姜氏如齊二月叔孫得臣如京師辛丑葬襄王

襄王七月而葬書者惡內也案六年八月乙亥晉侯

驩卒冬十月公子遂如晉葬襄公前年秋八月戊申

天王崩此年二月叔孫得臣如京師辛丑葬襄王魯

皆使卿會是天子諸侯可得齊也故書襄王之葬以

惡內

晉人殺其大夫先都三月夫人姜氏至自齊

夫人行不至此至者孔子傷文姜之亂出姜又不安

魯終以子弑而去十八年夫人姜氏歸于齊是也

晉人殺其大夫士穀

禾木反

及箕鄭父楚人伐鄭

楚復彊也楚自城濮之敗不敢加兵于鄭今伐鄭者

晉文既死中國不振故也城濮之敗在僖二十八年

公子遂會晉人宋人衛人許人救鄭夏狄侵齊秋八月

曾伯襄卒九月癸酉地震

震動也地而震失地道也

冬楚子使椒來聘

楚子執宋公伐宋復貶稱人者二十年至此稱爵者  
以其慕義使椒再來脩聘進之也椒楚大夫朱命故  
不氏秦術吳札皆此義也執宋公伐宋在僖二十一  
年

秦人來歸僖公成風之襚

音遂衣服曰襚

秦人來歸僖公成風之祔正也書者以見周室陵遲  
典禮錯亂秦人之不若也案四年十有一月壬寅夫  
人風氏薨五年春王正月王使榮叔歸含且贈三月  
辛亥葬我小君成風王使召伯來會葬此年秦人來  
歸僖公成風之祔不及事也其言正者妾母稱夫人  
非正也妾母稱夫人自僖公始天子不能正而秦人  
能之故曰秦人來歸僖公成風之祔此固周室陵遲  
典禮錯亂秦人之不若也悲夫



葬曹共公

十年春王三月辛卯臧孫辰卒夏秦伐晉

晉自令狐之戰不出師者三年其厭戰之心亦可見也而秦不顧人命見利而動又起此役夷狄之道也故曰秦伐晉以狄之

楚殺其大夫宜申自正月不雨至于秋七月及蘇子盟

于女

音汝又  
如字

栗

內不出主名微者蘇子天子卿文公使微者盟天子

卿其惡可知女栗地闕

冬狄侵宋楚子蔡侯次于厥貉

某百反

十有一年春楚子伐麋

俱倫反

夏叔彭生會晉卻缺于承

匡一作筐

承匡宋地

秋曹伯來朝公子遂如宋狄侵齊冬十月甲午叔孫得

臣敗狄于鹹

十有二年春王正月邶伯來奔

諸侯播越失地皆名此不名者非自失國也案莊八年師及齊師圍郕郕降于齊師自是入齊為附庸此而來奔齊所偪爾故不名

杞伯來朝二月庚子子叔姬卒

叔姬文公女也故曰子叔姬書者不服也

夏楚人圍巢秋滕子來朝秦伯使術來聘

術不氏與九年楚椒義同

冬十有二月戊午晉人秦人戰于河曲

二國之讎既易世矣二國之戰固可以已也而秦康  
晉靈猶尋舊怨殘民以逞是彰父之不德也故孔子  
自令狐之戰不復名其將帥然令狐之戰猶書及焉  
此不言及者惡其迭起報怨互覆師徒一目之也河  
曲晉地

季孫行父帥師城諸及鄆

帥師而城畏莒故也鄆莒魯所爭者

十有三年春王正月夏五月壬午陳侯朔卒邾子蘧

居其

反

蔭丈居反

卒自正月不雨至于秋七月大音泰室屋壞

大室伯禽之廟也周公曰太廟伯禽曰太室羣公曰  
宮文公為宗廟社稷主而俾大室屋壞其不恭也若  
此

冬公如晉衛侯會公于沓狄侵衛十有二月己丑公及  
晉侯盟公還自晉鄭伯會公于棐

公本朝晉既朝且盟又貪二國之會皆天子之事也  
故詳錄其地以惡之沓地闕棐鄭地

十有四年春王正月公至自晉邾人伐我南鄙叔彭生帥師伐邾夏五月乙亥齊侯潘卒

齊昭公

六月公會宋公陳侯衛侯鄭伯許男曹伯晉趙盾癸酉同盟于新城

新城宋地

秋七月有星孛

音佩

入于北斗

孛彗之屬偏指曰彗光芒四出曰孛入于北斗者入

于魁中也

公至自會晉人納捷菑

側其反

于邾弗克納

邾文公二子大子驪

俱縛反

且

子余反

立捷菑奔晉故晉

人納捷菑于邾或曰趙盾也或曰卻缺也邾人亂焉

晉人以庶奪嫡亂人之國此王法所誅也故曰晉人納捷菑于邾弗克納以疾之

九月甲申公孫敖卒于齊

奔大夫不卒此卒者為明年齊人歸其喪起敖奔莒

在八年

齊公子商人弑其君舍

舍未踰年稱君者孔子疾亂臣賊子之甚嫌未踰年與成君異也故誅一公子商人為萬世戒

宋子哀來奔

子哀宋公族子姓哀名也昭公無道子哀不食其祿懼亂來奔故曰宋子哀此亦公弟叔肸之比也叔肸事見宣公十七年



冬單

音善

伯如齊齊人執單伯齊人執子叔姬

單伯魯大夫子叔姬昭公夫人舍母也舍既遇弑魯使單伯視子叔姬故商人執子叔姬單伯至此猶見者蓋其子孫世爾

十有五年春季孫行父如晉三月宋司馬華

戶駕反

孫來

盟

宋自僖會諸侯于薄釋宋公之後未嘗與魯通問一旦華孫來請結盟于我以尋舊好故曰宋司馬華孫

來盟也不言使者與齊高子義同僖會諸侯于薄釋  
宋公在僖二十一年

夏曹伯來朝齊人歸公孫敖之喪

案八年天王崩公孫敖如京師弔廢命奔莒罪當誅  
絕雖死義不得反齊人歸之魯人受之皆非禮也

六月辛丑朔日有食之鼓用牲于社單伯至自齊

內大夫執則至至則名昭十三年晉人執季孫意如  
以歸十四年意如至自晉是也此不名者天子命大

夫也

晉卻缺帥師伐蔡戊申入蔡

蔡人不與新城之盟晉卻缺帥師伐蔡遂入其國其惡可知也新城之盟在前年

秋齊人侵我西鄙季孫行父如晉

行父公子友孫

冬十有一月諸侯盟于扈

公寬奢怠于國事諸侯皆會而公獨不與故諱之略

而不序也

十有二月齊人來歸子叔姬

齊人來歸子叔姬也商人既弑其子又絕其母甚矣  
齊侯侵我西鄙遂伐曹入其郛

十有六年春季孫行父會齊侯于陽穀齊侯弗及盟夏  
五月公四不視朔

天子班朔諸侯藏于祖廟每月朝廟北面受而行之  
文公不肖怠棄國政天子班朔而四不視之此文公

之不臣也甚矣故自是視朔之禮遂廢子貢欲去告  
朔之餼羊是也

六月戊辰公子遂及齊侯盟于鄆

音西丘

復陽穀之盟也鄆丘齊地

秋八月辛未夫人姜氏薨

僖公夫人文公母

毀泉臺

毀泉臺惡勞民也築之勞毀之勞既築之又毀之可

謂勞矣

楚人秦人巴人滅庸冬十有一月宋人弑其君杵臼  
稱人微者也名氏不登于史策故微者弑君稱人以  
誅之也

十有七年春晉人衛人陳人鄭人伐宋夏四月癸亥葬  
我小君聲姜

聲諡也九月而葬

齊侯伐我西鄙六月癸未公及齊侯盟于穀諸侯會于

扈

諸侯不序義與十五年同

秋公至自穀冬公子遂如齊

十有八年春王二月丁丑公薨于臺下

臺下非正也

秦伯瑩

音  
甕卒

秦康公

夏五月戊戌齊人弑其君商人六月癸酉葬我君文公

秋公子遂叔孫得臣如齊冬十月子卒

子子赤也不日弒也弒則曷為不日不忍言也案成君弒不地子赤未踰年故不日以別之不名文公既葬也文公葬公子倭弒子赤自立是為宣公

夫人姜氏歸于齊

夫人子赤母子赤見弒故大歸于齊

季孫行父如齊莒弒其君庶其

稱國以弒衆也謂肆禍者非一故衆弒君則稱國以



誅之言舉國之人可誅也

春秋尊王發微卷六

欽定四庫全書

春秋尊王發微卷七

宋 孫復 撰

宣公名倭

鳥戈反一名倭又作委

文公公子赤庶兄匡王

五年即位宣諡也善問周達曰宣

元年春王正月公即位公子遂如齊逆女三月遂以夫人婦姜至自齊

遂不稱公子前見也諸侯親迎禮之大者此言公子

遂如齊逆女遂以夫人婦姜至自齊皆非禮也稱婦有姑之辭不言氏者以喪取貶之也夫人貶則公之惡從可見矣文公薨十四月

夏季孫行父如齊晉放其大夫胥甲父于衛放逐也晉放其大夫胥甲父于衛非禮也

公會齊侯于平州

宣公弑子赤而立懼齊見討故會齊侯于平州平州齊地

公子遂如齊六月齊人取濟

子禮反

西田

平州之會方退齊人取濟西田其惡可知也

秋邾子來朝楚子鄭人侵陳遂侵宋

楚子鄭人侵陳遂侵宋鄭叛晉也

晉趙盾帥師救陳宋公陳侯衛侯曹伯會晉師于棐林

伐鄭

此晉趙盾帥師救陳會宋公陳侯衛侯曹伯于棐林

伐鄭也經言宋公陳侯衛侯曹伯會晉師于棐林伐

鄭者不與趙盾致四國之君也

冬晉趙穿帥師侵崇

崇秦與國

晉人宋人伐鄭

鄭未服也

二年春王二月壬子宋華

戶駕反

元帥帥及鄭公子歸生

帥師戰于大棘宋師敗績獲宋華元

宋華元帥師及鄭公子歸生帥師戰于大棘其衆敵

也宋師敗績獲宋華元惡鄭公子歸生與楚比周戕  
艾中國既敗宋師又獲其帥可謂甚矣大棘宋地  
秦師伐晉夏晉人宋人衛人陳人侵鄭

報大棘之戰

秋九月乙丑晉趙盾弑其君夷臯冬十月乙亥天王崩  
三年春王正月郊牛之口傷改卜牛牛死乃不郊猶三  
望葬匡王

天子七月而葬匡王崩至此四月非禮可知也

楚子伐陸渾之戎夏楚人侵鄭

鄭即晉故也

秋赤狄侵齊宋師圍曹冬十月丙戌鄭伯蘭卒葬鄭穆公

四年春王正月公及齊侯平莒及邾莒人不肯公伐莒

取向

舒亮反

公及齊侯平莒及邾可也莒人不肯惡在莒也公伐

莒取向此則甚矣邾莒皆小國



秦伯稻卒夏六月乙酉鄭公子歸生弑其君夷赤狄侵齊秋公如齊公至自齊冬楚子伐鄭

五年春公如齊夏公至自齊秋九月齊高固來逆子叔姬

不言來逆女者惡其成婚于魯也成婚于魯非禮也  
莊二十八年莒慶來逆叔姬義同

叔孫得臣卒冬齊高固及子叔姬來

大夫非君命不越境齊高固秋來逆子叔姬而冬與

子叔姬來豈君命也哉故曰齊高固及子叔姬來以惡之

楚人伐鄭

六年春晉趙盾衛孫免侵陳

陳即楚故晉趙盾衛孫免侵陳陳人請成

夏四月秋八月螽冬十月

七年春衛侯使孫良夫來盟夏公會齊侯伐萊秋公至自伐萊大旱冬公會晉侯宋公衛侯鄭伯曹伯于黑壤

黑壤晉地

八年春公至自會夏六月公子遂如齊至黃乃復

君命無所壅公子遂聘于齊至黃乃復廢君命也大  
夫以君命出雖死以尸將命遂以疾還其罪可知也  
卒已有事于太廟仲遂卒于垂

仲遂公子遂也不言公子者前見也仲遂卒與祭同  
日故曰卒已有事于太廟仲遂卒于垂字者天子命  
大夫僖十六年公子季友卒亦此義也

壬午猶繹萬入去籥

壬午猶繹非禮也萬入去籥知其不可繹而繹也仲  
遂雖卒猶當追正其罪宣公不能正仲遂之罪則當  
為之廢繹何者君臣之恩未絕也故曰壬午猶繹萬  
入去籥以惡之

戊子夫人嬴氏薨

宣公母

晉師白狄伐秦楚人滅舒蓼秋七月甲子日有食之既

冬十月己丑葬我小君敬嬴雨不克葬庚寅日中而克葬

敬諡嬴姓雨不克葬譏無備也凡喪浴于中雷飯于牖下小斂于戶內大斂于阼階殯于客位祖于庭葬于墓所以即遠也葬既有日不為雨止且經言己丑葬我小君敬嬴雨不克葬是己丑之日喪既行而遇雨也且雨之遲久不可得而知設若決日彌月其可停柩路次不行乎案禮平旦而葬日中而虞此言庚

寅日中而克葬葬之無備可知也

城平陽楚師伐陳

楚伐陳取成而還

九年春王正月公如齊

公有母喪而遠朝強齊公之無哀也甚矣

公至自齊夏仲孫蔑如京師

仲孫蔑公孫敖之孫

齊侯伐萊秋取根牟

根牟微國內滅國曰取此年取根牟成六年取鄆

音專

又市  
總反

襄十三年取郛

音詩

是也

八月滕子卒九月晉侯宋公衛侯鄭伯曹伯會于扈晉荀林父帥師伐陳辛酉晉侯黑臀卒于扈

會于扈陳侯不至晉荀林父以諸侯之師伐陳晉侯卒乃還

冬十月癸酉衛侯鄭卒宋人圍滕楚子伐鄭晉卻缺帥師救鄭

卻缺不克救鄭鄭與楚平

陳殺其大夫洩冶

稱國以殺不以其罪也

十年春公如齊公至自齊齊人歸我濟西田

公連年朝齊故齊人歸我濟西田言我明本魯地也  
齊人取濟西田在元年

夏四月丙辰日有食之己巳齊侯元卒齊崔氏出奔衛  
崔氏齊大夫言氏者起其世也東遷之後天子諸侯



大夫皆世隱三年書尹氏譏天子大夫故此書崔氏譏諸侯大夫也

公如齊五月公至自齊癸巳陳夏徵舒弑其君平國六月宋師伐滕公孫歸父如齊葬齊惠公

公孫歸父公子遂子

晉人宋人衛人曹人伐鄭

諸侯之師伐鄭取成而還

秋天王使王季子來聘

季字子爵天子之大夫稱字

公孫歸父帥師伐邾取繹

繹邾地

大水季孫行父如齊冬公孫歸父如齊齊侯使國佐來聘饑

五穀不成曰饑

楚子伐鄭

十有一年春王正月夏楚子陳侯鄭伯盟于辰陵

陳鄭即楚故也辰陵陳地

公孫歸父會齊人伐莒秋晉侯會狄于攢

才官反

函

音咸

攢函狄地

冬十月楚人殺陳夏徵舒

此楚子殺陳夏徵舒也其言楚人者與楚討也陳夏徵舒弑其君天子不能誅諸侯不能討而楚人能之故孔子與楚討也孔子與楚討者傷中國無人喪亂陵遲之甚也

丁亥楚子入陳納公孫寧儀行父于陳

上言楚人殺陳夏徵舒下言楚子入陳納公孫寧儀行父于陳者惡楚子行義不終也楚子討陳弑君之賊正也因而入陳以納淫亂之人此則甚矣

十有二年春葬陳靈公楚子圍鄭夏六月乙卯晉荀林父帥師及楚子戰于邲

扶必反  
一音弼

晉師敗績

鄭復從晉故楚子圍之六月晉荀林父帥師救鄭乙卯戰于邲晉師敗績鄭遂與楚平邲鄭地

秋七月冬十有二月戊寅楚子滅蕭晉人宋人衛人曹人同盟于清丘

清丘衛地

宋師伐陳衛人救陳

十有三年春齊師伐莒夏楚子伐宋

楚子伐宋以其伐陳也

秋螽冬晉殺其大夫先穀

十有四年春衛殺其大夫孔達夏五月壬申曹伯壽卒

晉侯伐鄭

鄭與楚故

秋九月楚子圍宋

楚之困宋也數矣案僖二十一年宋公楚子陳侯鄭伯許男曹伯會于孟執宋公以伐宋公會諸侯盟于薄釋宋公二十二年宋公及楚人戰于泓宋師敗績二十七年楚人陳侯蔡侯鄭伯許男圍宋公會諸侯盟于宋今又圍之楚之困宋也可謂數矣

葬曹文公冬公孫歸父會齊侯于穀

十有五年春公孫歸父會楚子于宋夏五月宋人及楚人平

此公孫歸父平宋楚也楚子圍宋九月天下諸侯莫有救者魯素比于楚而親于宋故使公孫歸父會而平之經先言公孫歸父會楚子于宋後言宋人及楚人平此公孫平宋楚可知也稱人衆辭

六月癸卯晉師滅赤狄潞氏以潞子嬰兒歸

詩云薄伐玁狁至于太原侵軼疆圉諸侯驅之逐之可也晉師滅赤狄潞氏以潞子嬰兒歸此則甚矣

秦人伐晉王札子殺召伯毛伯

生殺之柄天子所持也是故春秋非天子不得專殺王札子人臣也王札子人臣殺召伯毛伯于朝定王不能禁專孰甚焉故曰王札子殺召伯毛伯以誅其惡王札子王子札也曰王札子文誤倒爾召伯毛伯天子卿



秋螽仲孫蔑會齊高固于無婁

無婁杞邑

初稅畝

古者什一而稅于民初稅畝非正也此宣公奢泰國用不足又取私田以斂其一始什二而稅也故哀公問於有若曰年饑國用不足如之何有若對曰盍徹乎曰二吾猶不足如之何其徹也哀公言二吾猶不足則魯自宣公以來什二而稅也可知矣

冬蟪

悅全反又  
音尹絹反生

秋中之蝻未息冬又生子重為災

饑

十有六年春王正月晉人滅赤狄甲氏及留吁

潞氏餘種

夏成周宣榭火

成周東周也宣榭宣王之榭也其曰成周宣榭火者

孔子傷之也宣王振衰戡亂中興之主平惠以降皆

庸暗齷齪無有能以王道興起之者故因其災也傷之傷聖王之烈既不可得而見聖王之迹又從而災之也

秋郊伯姬來歸

奔而來歸也

冬大有年

宣公立十八年唯此言大有年者民大足食也書者以見宣公不道重斂于民常不足也

十有七年春王正月庚子許男錫我卒丁未蔡侯申卒

夏葬許昭公葬蔡文公六月癸卯日有食之己未公會

晉侯衛侯曹伯邾子同盟于斷

直管反  
一音短

道秋公至自會

冬十有一月壬午公弟叔肸

許乙反

卒

不曰公子公孫而曰公弟叔肸者無祿而卒也凡稱

公子公孫皆大夫也肸文公子宣公母弟宣公殺子

赤立肸惡之終身不食其祿非大夫也故曰公弟叔

肸卒所以重宣公之惡也

十有八年春晉侯衛世子臧伐齊公伐杞夏四月秋七

月邾人戕鄆

才陵反

子于鄆

戕殺也案僖十九年夏六月宋公曹人邾人盟于曹  
南鄆子會盟于邾己酉邾人執鄆子用之邾人執鄆  
子用之天子不能誅故此肆然復戕鄆子于鄆也地  
以鄆者責鄆臣子不能拒難

甲戌楚子旅卒

不書葬者貶之也吳楚僭極惡重王法所誅故皆不

書葬以貶之

公孫歸父如晉冬十月壬戌公薨于路寢歸父還自晉  
至笙遂奔齊

此言歸父還自晉至笙遂奔齊者惡不復命也歸父  
得幸于宣公秋聘于晉冬還至笙聞宣公薨以是奔  
齊人臣之義受命而出雖君薨猶當復命歸父還至  
笙不復命于魯以是奔齊非禮也故曰遂以惡之歸  
父公子遂子不言公孫者前見也

次定弓車全書

春秋尊王發微

春秋尊王發微卷七



欽定四庫全書

經部

春秋尊王發微卷八

詳校官給事中臣戴璐

給事中臣溫常綬覆勘

覆校官主事臣龔敬身

校對官中書臣蔣寬

謄錄監生臣陸紹臺

欽定四庫全書

春秋尊王發微卷八

宋 孫復 撰

成公名黑肱宣公子定王十七年即位成諡也

安民立政曰成

元年春王正月公即位二月辛酉葬我君宣公無冰

周之二月夏之十二月無冰冬溫也書曰僭常暘若無

冰常暘之應也

三月作丘甲

作丘甲丘無甲也丘無甲其曰作丘甲者成公即位不能修德以靖其國俾丘人為甲也謂丘出甲士一人古者九夫為井四井為邑四邑為丘出戎馬一匹牛三頭何甲士之有故曰三月作丘甲以惡之也

夏臧孫許及晉侯盟于赤棘

臧孫許臧孫辰子赤棘晉地

秋王師敗績于茅戎

此王師及茅戎戰王師敗績也經言王師敗績于茅戎者王者至尊天下莫得而敵非茅戎可得敗也定王庸暗無宣王之烈王師為茅戎所敗惡之大者故孔子以王師自敗為文所以存周也

冬十月

二年春齊侯伐我北鄙夏四月丙戌衛孫良夫帥師及齊師戰于新築衛師敗績六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子

首及齊侯戰于鞏齊師敗績秋七月齊侯使國佐如師  
已酉及國佐盟于表婁

齊侯春伐我北鄙夏敗衛師于新築魯衛使告于晉  
六月季孫行父臧孫許叔孫僑如公孫嬰齊會晉卻  
克衛孫良夫曹公子首伐齊癸酉及齊侯戰于鞏齊  
師敗績晉師逐齊侯使國佐如師請平卻克許之七  
月己酉盟于表婁齊頃數病諸侯以起此戰信不道  
矣然魯出四卿會晉衛曹敗齊侯于鞏盟國佐于表

婁此又甚焉故列數之以著其惡公孫嬰齊叔肝子  
新築衛地鞆表婁齊地

八月壬午宋公鮑卒庚寅衛侯速卒取汶陽田

汶陽之田魯地也齊人侵之今魯從晉故復取之不  
言取之齊者明本非齊地

冬楚師鄭師侵衛十有一月公會楚公子嬰齊于蜀丙  
申公及楚人秦人宋人陳人衛人鄭人齊人曹人邾人  
薛人鄆人盟于蜀

冬楚師鄭師侵衛公懼二師之及境也乃會楚公子  
嬰齊與諸侯之大夫盟于蜀先言公會楚公子嬰齊  
于蜀以見楚公子嬰齊仇也後言丙申公及楚人秦  
人宋人陳人衛人鄭人齊人曹人邾人郕人盟  
于蜀以見公叛晉即楚之惡也蜀魯地

三年春王正月公會晉侯宋公衛侯曹伯伐鄭

宋文衛穆未葬成公會晉伐鄭其惡可知也

辛亥葬衛穆公二月公至自伐鄭甲子新宮災三日哭

新宮者宣公也案哀三年威宮僖宮災稱謚此不稱  
謚者親廟也親廟災其曰新宮者成公主祀弗敢斥  
也故曰新宮災三日哭三日哭哀則哀矣何所補也  
乙亥葬宋文公夏公如晉鄭公子去疾帥師伐許公至  
自晉秋叔孫僑如帥師圍棘

棘附庸

大雩晉卻克衛孫良夫伐虜

在良反

咎

古刀反

如冬十有一

月晉侯使荀庚來聘衛侯使孫良夫來聘丙午及荀庚



盟丁未及孫良夫盟

此公及荀庚孫良夫盟也不言公者二子伉也二子來聘不能以信相親反要公以盟非伉而何故言聘以惡之荀庚先孫良夫盟先至也

鄭伐許

其曰鄭伐許者狄之也狄之者鄭襄背華即夷與楚比周一歲而再伐許故狄之也

四年春宋公使華元來聘三月壬申鄭伯堅卒杞伯來

朝夏四月甲寅臧孫許卒公如晉葬鄭襄公秋公至自晉冬城鄆鄭伯伐許

五年春王正月杞叔姬來歸

來歸者棄而來歸也

仲孫蔑如宋夏叔孫僑如會晉荀首于穀梁山崩

梁山崩其辭略者比沙鹿之異小也春秋災異小者略大者詳僖十四年秋八月辛卯沙鹿崩是也

秋大水冬十有一月己酉天王崩

定王也

十有二月己丑公會晉侯齊侯宋公衛侯鄭伯曹伯邾子杞伯同盟于蟲牢

蟲牢之盟鄭服也天王崩晉合諸侯同盟于蟲牢不顧甚矣蟲牢鄭地

六年春王正月公至自會二月辛巳立武宮

武宮者武公之宮也其毀已久宗廟有常故不言立此言二月辛巳立武宮非禮可知也

取鄆

音專又  
市衛反

宣九年取根牟此年取鄆襄十三年取鄆皆微國也

衛孫良夫帥師侵宋夏六月邾子來朝公孫嬰齊如晉

壬申鄭伯費

音秘

卒秋仲孫蔑叔孫僑如帥師侵宋楚

公子嬰齊帥師伐鄭

鄭從晉故也前年受盟蟲牢

冬季孫行父如晉晉欒書帥師救鄭

七年春王正月鼯鼠食郊牛角改卜牛鼯鼠又食其角

乃免牛吳伐郟

吳本子爵始見于經曰吳者惡其僭號外之也

夏五月曹伯來朝不郊猶三望秋楚公子嬰齊帥師伐鄭公會晉侯齊侯宋公衛侯曹伯莒子邾子杞伯救鄭八月戊辰同盟于馬陵

諸侯救鄭八月戊辰同盟于馬陵病楚故也馬陵衛地

公至自會吳入州來

吳乘楚伐鄭故入州來州來微國

冬大雩衛孫林父出奔晉

八年春晉侯使韓穿來言汶陽之田歸之于齊

汶陽之田齊所侵魯地也故二年用師于齊取之晉侯使韓穿來言歸之于齊非正也魯之土地天子所封非晉侯所得制也晉侯使歸之于齊是魯國之命制在晉也故曰晉侯使韓穿來言汶陽之田歸之于齊以惡之

晉欒書帥師侵蔡公孫嬰齊如莒宋公使華元來聘  
夏宋公使公孫壽來納幣

宋公使公孫壽來納幣非禮也

晉殺其大夫趙同趙括秋七月天子使召伯來賜公命  
成雖即位八年非有勤王之績天子使召伯來賜公  
命濫賞也天子天王王者之通稱

冬十月癸卯杞叔姬卒

杞叔姬五年來歸此而卒者為明年杞伯來逆叔姬

之喪起

晉侯使士燮來聘叔孫僑如會晉士燮齊人邾人伐郟

衛人來媵

以正反又音繩正反

媵伯姬也媵書者古諸侯嫁女二國媵之二國禮也  
三國非禮也此年衛人來媵九年晉人來媵十年齊  
人來媵是也唯王后三國媵

九年春王正月杞伯來逆叔姬之喪以歸

叔姬見弃而死義與杞絕此言杞伯來逆叔姬之喪



以歸者交譏之也

公會晉侯齊侯宋公衛侯鄭伯曹伯莒子杞伯同盟于蒲公至自會二月伯姬歸于宋

不言逆者微也

夏季孫行父如宋致女

致女常事也故隱二年伯姬歸于紀僖十五年季姬歸于鄆皆不書致此言季孫行父如宋致女者內女嫁為鄰國夫人當有常使禮也使卿非禮也

晉人來勝秋七月丙子齊侯無野卒晉人執鄭伯晉欒書帥師伐鄭

鄭叛晉故也

冬十有一月葬齊頃

音傾

公楚公子嬰齊帥師伐莒庚申

莒潰楚人入鄆秦人白狄伐晉鄭人圍許城中城

十年春衛侯之弟黑背帥師侵鄭夏四月五卜郊不從乃不郊五月公會晉侯齊侯宋公衛侯曹伯伐鄭

五月諸侯伐鄭鄭請成

齊人來媵丙午晉侯孺

反侯

卒秋七月公如晉

公如晉奔喪也

冬十月

十有一年春王三月公至自晉

公留于晉九月

晉侯使卻犢

反由

來聘己丑及卻犢盟夏季孫行父如

晉秋叔孫僑如如齊冬十月

十有二年春周公出奔晉

周無出也天下皆周也此言周公出奔晉者惡周公自絕于周也

夏公會晉侯衛侯于瑣澤秋晉人敗狄于交剛

瑣澤交剛地闕

冬十月

十有三年春晉侯使卻錡

魚綺反

來乞師三月公如京師

夏五月公自京師遂會晉侯齊侯宋公衛侯鄭伯曹伯

邾人滕人伐秦

晉侯將伐秦春使卻錡來乞師三月公如京師者因會諸侯伐秦過京師而朝也因會諸侯伐秦過京師而朝禮與公朝京師禮也因會諸侯伐秦過京師而朝非禮也案周官六年五服一朝又六年王乃時巡諸侯各朝于方岳大明黜陟未有因會諸侯伐國過京師朝之之事故曰春晉侯使卻錡來乞師三月公如京師夏五月公自京師遂會晉侯齊侯宋公衛侯鄭伯曹伯邾人滕人伐秦以惡之也

曹伯廬卒于師秋七月公至自伐秦

不以京師至者明本非朝京師

冬葬曹宣公

十有四年春王正月莒子朱卒夏衛孫林父自晉歸于衛

林父七年奔晉其言自晉歸于衛者由晉侯而得歸也衛大夫由晉侯而得歸則衛國之事可知也

秋叔孫僑如如齊逆女鄭公子喜帥師伐許九月僑如

以夫人婦姜氏至自齊

叔孫僑如如齊逆女僑如以夫人婦姜氏至自齊皆非禮也惡不親迎也

冬十月庚寅衛侯臧卒秦伯卒

十有五年春王二月葬衛定公三月乙巳仲嬰齊卒

仲嬰齊公孫歸父子公子仲遂孫也孫以王父字為氏公之子曰公子公子之子曰公孫公孫之子以王父字為氏也

癸丑公會晉侯衛侯鄭伯曹伯宋世子成齊國佐邾人  
同盟于戚晉侯執曹伯歸于京師

晉侯執曹伯稱爵者執得其罪也曹伯不道晉侯會  
諸侯于齊討而執之又歸于京師書者非天子命也  
公至自會夏六月宋公固卒楚子伐鄭秋八月庚辰葬  
宋共音恭公宋華元出奔晉宋華元自晉歸于宋宋殺  
其大夫山

宋殺其大夫山楚殺其大夫得臣皆未命大夫也故



不氏

宋魚石出奔楚冬十有一月叔孫僑如會晉士燮齊高無咎宋華元衛孫林父鄭公子鮑邾人會吳于鍾離

此言叔孫僑如會某人某人會吳于鍾離者諸侯大夫不敢致吳子也吳子在鍾離故相與會吳于鍾離爾

許遷于葉

式涉反

十有六年春王正月雨木冰

雨木氷者雨著木而氷也

夏四月辛未滕子卒鄭公子喜帥師侵宋

鄭叛晉故侵宋

六月丙寅朔日有食之晉侯使欒黶

於斬反又音於玷反

來乞師

甲午晦晉侯及楚子鄭伯戰于鄢

於晚反又音於建反

陵楚子鄭

師敗績

鄭公子喜叛晉侵宋故晉侯使欒黶來乞師六月晉

侯伐鄭鄭人使告于楚楚子救鄭甲午晦晉侯及楚

子鄭伯戰于鄢陵楚子傷焉楚子鄭師敗績楚不言  
師舉重也戰不言公者公不出師也案十三年春晉  
侯使卻錡來乞師三月公如京師夏五月公自京師  
遂會晉侯齊侯宋公衛侯鄭伯曹伯邾人滕人伐秦  
十七年秋晉侯使荀瑩來乞師冬公會單子晉侯宋  
公衛侯曹伯齊人邾人伐鄭此不言公不出師可知  
也鄢陵鄭地

楚殺其大夫公子側秋公會晉侯齊侯衛侯宋華元邾

人于沙隨不見公

不見公者晉侯不見公也鄆陵之戰公不出師故晉侯不見公沙隨宋地

公至自會公會尹子晉侯齊國佐邾人伐鄭

尹子天子卿子爵

曹伯歸自京師

前年晉侯會諸侯于戚執曹伯歸于京師此言曹伯歸自京師者天子赦之之辭也春秋亂世強侯不道

執辱小國之君皆非天子命執之赦之自我而已僖  
二十八年晉侯入曹執曹伯畀宋人晉人執衛侯歸  
之于京師冬曹伯襄復歸于曹三十年衛侯鄭歸于  
衛是也惟負芻得反于曹由天子命故曰曹伯歸自  
京師異其文以別之

九月晉人執季孫行父舍之于莒

音條

丘

沙隨之會晉侯既不見公今又執季孫行父舍之于  
莒丘魯一不出師而晉再辱于魯其惡可知也莒丘

晉地

冬十月乙亥叔孫僑如出奔齊十有二月乙丑季孫行父及晉卻犂盟于扈公至自會

行父不至者舉公至為重也

乙酉刺公子偃

十有七年春衛北宮括帥師侵鄭夏公會尹子單子晉侯齊侯宋公衛侯曹伯邾人伐鄭六月乙酉同盟于柯陵秋公至自會齊高無咎出奔莒九月辛丑用郊

九月辛丑用郊瀆亂尤甚

晉侯使荀瑩來乞師冬公會單子晉侯宋公衛侯曹伯  
齊人邾人伐鄭

鄭與楚比周晉侯再假王命三合諸侯伐之不能服  
鄭中國不振可知也

十有一月公至自伐鄭壬申公孫嬰齊卒于狸脰

市軫反

狸脰魯地

十有二月丁巳朔日有食之邾子貜

俱縛反又音居壁反且

子余反

卒晉殺其大夫卻錡卻犇

尺由反

卻至

君之卿佐是謂股肱厲公不道一日而殺三卿此自禍之道也誰與處矣故列數之以著其惡明年晉弑

州蒲

楚人滅舒庸

十有八年春王正月晉殺其大夫胥童庚申晉弑其君州蒲齊殺其大夫國佐公如晉夏楚子鄭伯伐宋宋魚石復入于彭城



此楚子伐宋取宋彭城與魚石守之以逼宋也其曰  
宋魚石復入于彭城者不與楚子伐宋取宋彭城以  
與宋叛臣也故以魚石自入犯君為文

公至自晉晉侯使士匄來聘秋杞伯來朝八月邾子來  
朝築鹿囿己丑公薨于路寢冬楚人鄭人侵宋晉侯使  
士魴來乞師十有二月仲孫蔑會晉侯宋公衛侯邾子  
齊崔杼同盟于虛

起居  
他丁  
反

楚人鄭人侵宋晉侯使士魴來乞師故仲孫蔑會晉

侯宋公衛侯邾子齊崔杼同盟于虛朾將救宋也虛  
朾地闕

丁未葬我君成公

春秋尊王發微卷八